



Aningaasaqarnermut Naalakkersuisoq

Aningaasaqarnermut Ataatsimiititaliap suliaq nr. 01.31.06/10-00464 pillugu tallimanngornermi ulloq 26. marts 2010 aalajangiineranik Naalakkersuisunut ilisimatitsineq.

Københavni Naalakkersuisunut inissiamik tunisinissaq pisinissarlu.

Naalakkersuisut inassutigaat,

- Naalakkersuisut Siulittaasuata Naalakkersuisoqarfiata inissiamut Christianshavnimiittumut taartissamik, 3.200.000 koruunit iluanni akeqartinneqartumik pisinissaa Aningaasaqarnermut Ataatsimiititaliap akuerissagaa,
- kontomi pingaarnermi 87.72.07-imi, Sulisunut inissianut tunngasumi, suliassamut nr. 001.30.010-mut Naalakkersuisunut inissiamik tunisinermut pisinermullu, KBH, tunngasumi aningaasaliissutit 500.000 koruuninik amerlineqassasut,
- kontomi pingaarnermi 80.00.01-imi, Nuussinissanut sillimmatinut tunngasumi aningaasaliissutit 500.000 koruuninik ikilisinneqassasut.

Aningaasaqarnermut Ataatsimiititaliap oqaaseqaatai

Namminersorlutik Oqartussat Københavni inissiaataata taarserneqarnissaa siunertaralugu ilanngaaseereerluni 500.000 kr.-inik aningaasaliissuteqarnissaa Naalakkersuisut suliami matumani qinnutigaat. Taamaalillunilu Christianshavnimi kalaallit sinniisuutitaqarfianut sanilliullugu maanna inissiap Østerbromiinnera naapertuutinningsutut isigineqartoq oqaatigineqarpoq.

Inissiap Naalakkersuisunut ilaasortanit aammalu Namminersorlutik Oqartussat qitiusumik allaffeqarfianni naalakkersuisoqarfinni pisortanit atornerqartarnissaa naatsorsuutigineqartoq qinnuteqaammi allassimavoq. Inatsisartunut siulittaasuusimasup inissiattoqqamik siusinnerusukkut atuisarnera ataatsimiititaliamit ilisimaneqarmat maanna Inatsisartut siulittaasuata (aammalu Inatsisartunut ilaasortat sinnerisa) pisortatigoortumik angalanernut atatillugu inissiaq nutaaq aamma atortassagaat naatsorsuutigineqarpoq.

Taxanut akiligassat appasinnerulernerisigut aammalu Kalaallit Nunaata aallartitaqarfiata inissiamik pisariinnerusumik sullissinerata kingunerisaanik inissiap nutaap ingerlatsinikkut sipaaruteqarfigineqarnissaa naatsorsuutigineqartoq qinnuteqaammi allassimavoq. Sipaarutaasinnaasunut taakkununga ersarissumik ataatsimut missingersuummik Naalakkersuisut saqqummiussisimasinnaagaluartut ataatsimiititaliaq isumaqarpoq.

Ataatsimiititaliamit isumaqatigiittumit oqaatigineqassaaq Københavni inissiamik nutaamik pisinissaq 2010-mi imaluunniit 2011-mi aningaasanut inatsisissatut siunnersuummut

ilanngunneqarsimasariaqaraluartoq. Taamaalillunilu ataatsimiititaliaq isumaqarpoq suliaq matumani pineqartut ittoq Nunatta Karsiata aningaasaataanik Inatsisartut pingaarnersiuneranni ilanngunneqarluarsinnaasimagaluartoq.

Tamatuma kingorna ataatsimiititaliaq suliami matumani amerlanerussuteqartunut ikinnerussuteqartunullu avippoq.

Ataatsimiititaliami ikinnerussuteqartut, Per Berthelsen aamma Finn Karlsen isumaqarput piffissami pisortat sipaaruteqarfigisaanni nunattalu karsiata killilinnik aningaasaateqarnerani Namminersorlutik Oqartussat Københavnimi inissiaataannik taarsiinissamut pisortat aningaasaataannik atuinissaq pissusissamisuunngitsoq. Inissiamik nutaamik pisinerup annertunerusumik sipaaruteqarfigineqarnissaa ikinnerussuteqartut uppernarsisinneqanngitsutut isigaat, taamaattumillu qinnuteqaat ataatsimut isigalugu itigartinneqartussatut inassutigalugu.

Ataatsimiititaliami amerlanerussuteqartut, Naaja Nathanielsen, Olga P. Berthelsen aamma Niels Thomsen isumaqarput inissiap nutaap Københavnimi qiterpasinnerusumi inissisimanerata pitsaaqutaasigut inissiap pigineqareersup taarserneqarneratigut ataasiartumik killilimmik aningaasartuutit matussuserneqartut. Tamanna tunngavigalugu amerlanerussuteqartut qinnuteqaat akuerisinnaavaat.

Amerlanerussuteqartut kissaataat naapertorlugu aalajangiisoqarpoq.

Aningaasaqarnermut Ataatsimiititaliap aalajangiinera

Siuliani allassimasutut paasinnillutik Naalakkersuisut inassuteqaataat Aningaasaqarnermut Ataatsimiititaliami amerlanerussuteqartut **akueraat**

Aningaasaqarnermut Ataatsimiititaliaq sinnerlugu

Naaja Nathanielsen
Aningaasaqarnermut Ataatsimiititaliami siulittaasoq